

〔清〕查繼佐 撰

明書（罪惟錄）

齊魯書社

三

明書
(罪惟錄)



明書（罪惟錄）

③

〔清〕查繼佐撰 倪志雲 劉天路 點校

齊魯書社

明書列傳卷之八下

啟運諸臣列傳下

藍 玉

藍玉，定遠人。開平王遇春婦弟也。長身頽顏，有勇略，隸開平麾下，每戰先登，無所不摧陷。其威略似開平，以故開平寵任之。而太祖亦以開平故，改容視玉。初授管軍鎮撫，歷自積戰功，超為都督僉事。十一年，同西平侯沐英討西番，擒其酋癭脖子，鹵斬以千計。還，封永昌侯。久之，以征南左副將軍同穎川傅友德討雲南，轉戰平之，事在《友德傳》，增祿五百石。再以征虜右副將軍同宋國馮勝襲金山納哈出，降之，併降其衆二十餘萬。即軍中拜征鹵大將軍，代宋國公。踰年，領六將軍往討元丞相哈剌章於和林。時鹵主脫古思帖木兒駐捕魚兒海，玉率勁騎十餘萬，自慶州問道襲之，去海四十里而軍，不見鹵，欲還。定遠侯王弼請玉無還，且曰：“兵以不意，吾勞而露，使彼主而客我，未便。”戒諸軍穴地而爨，毋使見烟火。及

抵海，知鹵營海東北八十里，前薄之。大風揚沙，晝晦，鹵大驚。其太尉蠻子輕出搏戰，一鼓破斬之，衆遂潰，請降。鹵主與太子天保奴以數十騎遁去，獲其次子地保奴及故太子必里禿妃、諸公主等百二十三人，吳王朵兒只、代王達里麻、平章八蘭等將相官校二千九百九十四人，軍士一萬五千餘人，男女七萬七千餘口，寶璽圖書一百四十九，金印一，銀印三，馬四萬七千匹，駝四千八百頭，牛羊十餘萬，車二千餘輛。復破降哈刺章，獲將士萬五千八百人，馬駝四萬八千餘匹。捷聞，上使使齎敕諭玉，比之衛青、李靖云。玉傲而淫，私元妃，事露，妃自縊死。凱旋，上特賜玉金幣踰等，然猶面責數玉，擬封梁國公，嘯喈且久，改封涼國公，而鑄其過於鐵券。尋討平散毛峒，擒土酋刺惹等萬餘人，置大水田千戶所。進平施南、忠建二宣撫司叛蠻，增歲祿五百石。尋詔還鄉，復與魏國輝祖、曹國景隆措置陝西邊事，至蘭州，墜馬傷，上手詔慰勞之，比於中山、開平王。尋召還，出理蘭州、莊浪等七衛兵。玉追捕逃寇祁者孫弗及，遂深入罕東，至阿真州，番酋皆遠遁。會蜀故降將月魯帖木兒反，使玉移師討之。至則四川都指揮瞿能等已大破其衆，月魯走柏興。玉以計誘縛其父子，械京師斬之。而盡降其餘黨，便宜請增設諸衛，上從之。遂班師。定東宮官屬，玉兼太子太傅。玉怏怏不樂居宋、潁二公下，詬曰：“乃無太師藍玉哉！”玉故恃上寵，多蓄莊奴、假子數千人，常占東昌民田自予。民訟之御史，且捕獄，玉執御史，笞而逐之。度喜峰關，關吏以夜，不時納，玉大怒，縱兵毀關入。上聞之，已心惡玉，不言

也。玉間有奏請，不盡聽，退而謂所親：“上疑我矣。”錦衣指揮蔣獻告玉反，上集群臣廷訊，玉不肯伏。獄具，磔於市，夷三族，榜其狀示天下，并載《逆臣錄》。玉既誅，徹侯功臣文武大吏以至偏裨將卒，坐黨謀死者可二萬人。初，玉之出討越嵩也，與部將十餘陛辭。上方留玉與議，呼諸將去，三呼無應者，玉舉袖一揮盡起。蓋久疑之矣。或云楚王母胡妃墮胎事，玉以私怨搆之。

論曰：玉於太子至親，常說太子：“臣觀燕王英武，負上寵愛至，而術者言燕地有天子氣。太子幸自愛。”然則玉忠志無他矣。而燕王從中搆之，必殺玉。史不載其實，但云獄具，則二萬餘人豈皆無辭，不待再聽者乎？星者劉日新策玉封涼國而誅，而日新與俱，已而果然。或曰存玉則可以無燕。玉坐黨，公則信、宋、潁三人，侯則長興、武定、鳳翔、定遠、永平、崇山，而史於宋、潁、定遠但書卒，於永平但云坐法死，於崇山但云有罪伏誅，並不及黨玉事，豈猶有諱之者歟？即以陛辭，揮不去，細柳軍法也。功冠諸侯以之，帝豈不稔此？或曰：“存玉以無燕，不存玉以有燕。”

廖永忠 兄永安 孫鏞、銘

廖永忠，巢縣人。父旺，五子，永忠與其兄永安最少。元亂，妖寇彭祖兵起，永安與兄永堅為其萬戶。彭祖既敗，永堅往仕漢友諒，為參政。永安字彥敬，乃與其弟永忠、同縣趙普勝、俞廷玉、玉子通海及趙伯仲、伯仲弟庸、合肥人張德勝、葉昇、無為人桑世傑、含山人華高，以戰船

千餘，結水軍屯巢湖捍盜。廬人左君弼者，故亦盜，惡永安等，不與合，率兵攻之。永安等乃使韓成持書謁太祖和陽，盡以舟師歸附。從攻蠻子海牙及峪谿，大破之，矢傷永安鼻，再敗之於青沙。從渡江，永堅亦來歸。取太平，襲安慶，往來用兵，滅陳兆先，永安皆與通海同事，功亦相參。戊戌取宜興，陞同知樞密院。已而周士誠兵寇常熟，連敗之。十月，永安等再拔宜興，追擊至太湖，乘勝深入，後軍不繼，水淺舟膠，為所獲。士誠欲降之，永安不屈，被拘。已而徐達鹵周士德於常州，周使人求和，請歸永安，易士德。太祖不許，遙授永安平章，封楚國公，賜號及誥，而贈旺為涼國公。丙午，卒於姑蘇，年四十七。洪武元年，侑享太廟，謚曰武閔，加贈開國輔運推誠宣力武臣、光祿大夫、柱國、同知大都督府事。十三年，改封鄖國公。永安無子，以兄永清子昇嗣，為指揮僉事。弟永忠，饒智勇，豪邁，從兄來歸。太祖見其年少，曰：“若亦欲肘金印富貴哉？”永安既為吳所執，永忠以樞密僉院領其兵。友諒入寇龍江，與張德勝乘勝追及采石，奮敗之，復太平，遷同知樞密院事。從征安慶，與俞通海等擊漢水寨，破之，長驅至江州，仰攻不可上。永忠度其城勢，架橋舟後，反舟而前，名曰天橋，至城下，與女牆齊，接而登，克之。復與趙德勝攻下瑞、臨、吉安諸郡。從戰鄱陽，冒鋒出上舟於圍。友諒中矢死，遂平武昌，遷湖廣行中書省左丞，鑄金字八，旌其功於門。規取淮東，士誠以兵薄海安，綴我師，太祖誡大將軍泰州勿動，而令永忠還兵水寨禦之，周兵遁，淮揚悉平。從克姑蘇，錄功，陞平章。副湯和會討

方國珍，降之，從海道徑取福州。洪武元年，兼太子詹事。略定閩中諸郡，至延平，攻其西門，部將開門降。明年，復從海道取廣東，朱亮祖為副，先以書諭降何真。師至東莞，真從潮州上印章圖籍，率官屬出迎。攻破偽參政邵宗禹，數其殘暴，斬之，廣人大悅。馳諭九真、日南、朱厓、儋耳三十餘城，皆納印，請吏。趨廣西，至梧州，降元達魯花赤拜住。其尚書普顏帖木兒、張翔募兵迎戰，無有應者，走鬱林。亮祖勒兵追之，普顏戰死，翔赴水死。會征南將軍楊璟下靖江諸郡，兩廣悉平。明年，還，封德慶侯。初，論功，當封國公，以鄱陽之戰，使所善儒士窺意徼封爵，故稍次之。食祿千五百石，贈三代。四年，副湯和舟師由瞿塘伐蜀。和兵沮不進，時傅穎公已圍成都，帝以和為怯。永忠乃密遣壯士數百人，衣青衣，舁小舟，魚貫叢箐中，出上流，蜀人不知也。夾攻之，焚三橋，斷橫江鐵索，擒蜀將蔣達等八十餘人，裨將鄒興中箭死。永忠遂入夔州，而和亦至。師抵重慶，明昇方督師重慶，大懼。右丞劉仁勸歸保成都，母彭氏泣曰：“保成都，旦夕耳。”昇遂面縛銜璧，奉表詣軍門降。和受璧，永忠解縛，檻送京師，蜀平。永忠功次穎公，賜第。尋出征胡，捕倭。八年，坐僭用龍鳳章服不法事伏誅，既厚賻之。子權，娶湯和女，為散騎舍人，嘗從御史大夫丁玉征松、疊。十三年，嗣侯，從傅將軍征雲南，領兵守畢節，移守瀘州，召還。十七年，卒。權之子鏞，以嫡子任散騎舍人，歷官都督。建文中，充宿衛。燕王入京，以鏞與弟銘常受學方孝孺，使往召之。孝孺怒曰：“若讀書幾年，乃不識‘是’字！”上怒，收孝孺，族之。

鏞、銘逃匿安陸山中，偶與書生弈，以舉止不凡，被疑，事泄。永樂元年，錦衣衛奏獲鏞，送刑部論死。弟銘、鉞，從父昂與昇，俱謫戍邊。母湯并銘女送浣衣局。從兄基，指揮同知，自首，獄死。永忠雖以功受封，每每失上意，故贈謚皆不及。後江夏侯周德興有罪，當下獄，上特宥赦，召諸將相諭之，以故德慶侯廖永忠犯法侈僭為戒。弘光中，追贈慶國公，謚武勇；孫鏞，追贈德慶侯；鏞弟銘，錦衣衛都指揮。諸巢湖軍皆有傳。華高，含山人，歷功鎮湖廣，封廣德侯。後卒厓州，贈巢國公。

論曰：即楚公脫囚，而效周力，不過為再興、天瑞輩，與城俱碎耳。顧完節足以風繫臣後世。德慶即不得公，亦念其副東甌之烈哉！再傳鏞、銘，讀書識“是”字，雖由正學之教，亦楚公家法殷矣。按庚午詔書，德慶坐楊憲黨伏誅，及按《通鑑博議》，坐沉韓林兒瓜步；而《實錄》曰：“永忠病卒。”夫《實錄》阿，不足據。若以沉瓜步為罪，則非當日情事。忠或奉密命有之，否即擅，其意亦頗與劉文成不設中書座之指合，何至有券不宥？或曰以僭擬龍鳳故，則借也。帝念太子文弱，勇鋤名勳，乃入忠憲黨不免。夫宋國棄慶陽走歸，德慶不過遣所知，未嘗離軍，雖皆伺封爵，而微有不同，而輒借此嗇其報，功次潁國，萬世猶一口矣。持無上裁諸雄，此時不私龍鳳章服，家幾人，即以其僭可誅，亦必嚴令再四，而此似幸其有此章服，則知帝意固別有在也。嗟乎，胡、藍諸案，太祖酷治黨不遺力，似灼見明末啟、禎以後率坐黨敗，蓋防微已在數百年之前矣哉？

俞通海父廷玉 弟通源、通淵

俞通海，字碧泉，巢縣人。父廷玉，弟通源、通淵。元末，有彭祖及金花姐者，以妖術煽江淮，人多應之。廷玉率其子從妖黨李普勝為軍，普勝敗沒，乃結水寨巢湖自固。乙未，太祖總兵和陽，歸款乞援。太祖喜，謂李善長曰：“巢湖豈知我師且渡江哉，為我辦舟楫，甚善。”親率兵逆之，乘漲問道至黃墩。時趙普勝中變，太祖恐衆解，還集商舟，以和陽兵復至黃墩，督攻海牙，海牙兵潰，直趨和陽。授通海萬戶。六月，渡揚子，克采石，取太平，有功。時海牙悉驅戰艦，結寨采石，與元帥陳也先從子兆先合淮兵，營方出相犄角，窺太平。丙申，從攻海牙，大破走之，并破兆先營。是月，克臺城，亦下阿魯灰者林苗軍水寨，拔鎮江，追康元帥降之，進統軍元帥。取常州、宣城、寧國，功多。略太湖，降周守帥王貴、鈕津等，猝遇其右丞呂珍於東洞庭。時大將軍已西，獨帥餘舟接戰，流矢中右目，傷，護痛且下，而令親兵身被其甲睨船，賊不敢逼。戊戌，擣江陰，奪馬馱沙。再敗天完趙普勝於樅陽，復池州，陞僉書樞密院事。庚子，走漢友諒於龍江，縱火焚其舟，進樞密院同知。從克漢銅陵，擣九江、蘄州、黃州等郡。癸卯，救宋韓林兒於安豐，敗周呂珍兵，移攻廬州。七月，漢圍南昌急，上大發兵，遇敵於康郎山。通海先諸將，乘風縱火，焚其舟。已上舟膠，幾為所乘，通海飛舸至，水涌舟脫，猝射中漢驍將張定邊，敵退。相持數日不下。敵利巨艦若城墉。我舟小，便馳驟，然往往被壓不起。通海常

以首抵艦得脫，鐵盔盡裂。隨棹七舟，實葦火，乘風入敵，焚其戰艦數百，偽王友仁、友貴皆死。更以小舟冒敵入，我師遙望無所見，久之，意已盡沒，忽飄飄繞出敵舟旁，我師震呼，奮擊，大敗之。敵且拔水寨而去，我軍柵罌子口，橫截左蠡，不得出。通海進曰：“湖有浮沙，舟輒膠，不利。彼窮而搏，彼此之勢也。請入江，據上游自休，俟其逸攫之。”而劉基亦請（從）〔徙〕軍湖口。太祖從其計，友諒死。明年，下武昌，陳理降。上為吳王，陞中書省平章事，填廬州，繕塘壑，興農田，兵民寧輯。從征浙西，克吳興，隨下沿海郡縣。偽帥陳仁壽率數千人走海，聞通海兵律秋毫不犯，復回請降。圍姑蘇，敗敵滅渡橋，蕩其營，至桃花塢，中流矢，護創建康。王幸其第撫視之，呼曰：“平章即知予來乎？”已沉不能答。王揮涕而出。明日卒，年三十八。追封豫國公，改號國公，謚忠烈，侑享太廟，肖像功臣廟。父廷玉亦以死事贈河間郡公，謚武烈。通海沉機簡重，勞不矜能，嚴而有惠，卒，無子。弟通源，字百川。通海卒，即軍中領其兵，攻蘇州，擒士誠，嗣通海官。從大將軍征中原，下山東、河南北、山西諸郡。從副將軍馮勝等會兵太原，取陝西，克慶陽。尋張良臣復以慶陽叛，率師自臨洮疾趨至涇州，合兵圍而斬之。西征王保保，出連雲棧，克興元，皆先登。洪武三年，封南安侯，食祿千二百石，與世券。從將軍廖永忠伐蜀，又從魏國公出寨征甘肅有功。八年，徙江南豪四十萬田鳳陽，命撫輯，開水利墾田。攻雲南，征廣南諸蠻，俘斬數萬。二十二年，詔還鄉，未行，卒。卒逾年，坐黨事，以死不問。通淵以父兄故，充

參侍舍人。從大將軍征秦隴燕趙功，陞督府僉事。征哈刺答，至捕魚兒海，獲酋長人畜，班師。轉餉二十萬石江西，又征都勻龍場諸蠻峒，克辰、沅、寶慶，俘獲多。封越嵩侯，食祿二千五百石。率師討建昌叛賊，築城越嵩。二十六年，坐累罷侯。建文中，召為豹韜衛指揮使，復侯，戰歿白溝河。子翊先卒。次靖嗣官，明年卒。次端，優給錦衣，未幾卒，無後。通源子祖，病悸不能嗣。孫宗、曾孫信。信宣德十年乞嗣，信子瓏，子仲，弘治五年皆乞嗣，不許。弘光中，追贈通淵嵩國公，謚襄烈。

論曰：俞氏舟楫功為造明第一。使無巢湖破浪之村，勢必俯就安豐，束手出劉福通下。彼尺書使為東西，即何以辭哉？夫遠宋而宋隱為我用矣。鄱陽之戰，小舟冒入，直追赤壁故事。青田但曰徙軍湖口，而上游擊遁之計，出自虢國。夫楚勢素乘高，吾猝乘楚高扼其出，猶之功策耳。父廷玉死軍中，弟越嵩通淵死建文白溝之難，南安通源，西南偉績。蓋一室效命，不但舟楫，而節烈與勳名更烈諸世家。

胡大海養子德濟 王宗顯

胡大海，字通甫，虹縣人。長身鐵面，智力過人，兩目有光，每夜出，燁燁如炬。甲午，謁太祖，為前鋒。從入和州，克采石，攻金陵、常州，先登，授右翼統軍元帥，宿衛。佐鄧愈自績溪進攻浙東諸郡，至於遂安。元苗帥楊完者以兵十萬來爭徽州，大海前諸軍斬其部將，乃克嚴州，與李文忠同秩守之。二人微有隙，太祖密戒文忠，由是相

協，互為力。遷行樞密院判。嘗語鄧愈曰：“吾觀蘭谿為婺右臂，公引兵下之，可以無婺。”遂折蘭谿，陞大海僉院守之，而婺不即下。太祖躬來視師，大海見其客烏江王宗顯，太祖喜曰：“翁來，即安能入婺為說客乎？”宗顯行，還報曰：“婺將貳，可仆也。”曰：“即然，汝為婺守。”元將果內疑，開東門納師，元守臣僧住死之，遂真以宗顯知府事，陞大海僉書行樞密院，以王愷為都事。時元伯顏不花守衢州，多智略，而處州守將石抹宜孫善用士，紹興故周呂珍所據也。上以三城密邇勁敵，以大海為江南行省參政，與常遇春共規進取。明年，諸全下，并下衢州，元龍泉守將胡深收處四下邑，反宜孫來降。大海以其間出樊嶺，與耿再成合軍，連敗宜孫，宜孫遁，處州定。已而呂珍憤諸全之失，盛兵入犯，堤水灌我，大海奪堤反灌之，珍敗窘，馬上折矢求平，大海許之。後參佐悔勿許，大海曰：“言出而背之不信，既縱而襲之不武。”遂引還，珍亦去。庚子，太祖方逆拒漢友諒龍江，遣大海擣廣信，以制其後。既走友諒，而廣信亦下。大海曰：“此閩楚衿衿，不可忽。”上令大海養子德濟以行樞密院同僉鎮之。尋漢將李明道來爭廣信，德濟嬰城乞援，父大海疾援，虜明道，因得為向導，尋下江西。大海初定嚴州時，苗將蔣英、劉震等以楊完者見殺，懼，款歸。大海隸其衆麾下，推誠不貳，而分其黨李佑之等戍處州。至是，英謀作亂，震曰：“參政遇我厚，吾何忍背之？”有李福者，張目曰：“舉大事，顧小恩哉！”潛通處佑之，期二月之七齊發。是日，英等陽邀大海八咏樓觀弩，大海上馬，英令其黨鍾矮子詭叩馬號曰：“蔣英無故欲

殺我。”大海未及答，反顧英，英袖出鐵鎚，若擊矮子狀，特中大海腦，仆地，英即斷其首，并殺子關住。而郎中王愷亦遇害，愷別有傳。總管高子玉從難。行省掾史章誠被執，脅降，不屈死。時李文忠自嚴州疾以兵定之，并定處州。是後敵來犯婺，屢顯祥異。或夢大海指畫，或星火滿野，汹汹人馬聲，及出師，必大捷。後李將軍文忠下杭，縛英、震至京，上命懸大海像，刺血以祭。贈越國公，謚武莊，祭故功臣雞籠山，大海位第一。大海嘗曰：“吾不知書。吾行兵惟有三事：不殺人，不虜人婦女，不焚廬舍。”以故所至健兒歡附，編氓寧輯。初，蔣英等既殺大海降吳，以呂珍疾犯諸全，文忠檄德濟廣信，合敗之。己癸卯諸全守將謝再興叛降吳，德濟以浙東行省參政統重兵守諸全新城，同李文忠拒敗吳師二十萬於龍潭。洪武三年，從大將軍北征，失機，械至京，宥復官。後為都指揮使，鎮陝西，卒。王宗顯既知婺州，開館延召名儒，為五經師及學正訓導等官。喪亂之餘，學校久廢，至是稍復文教。大海七代孫應襲汝鍾，天啟五年請自效，備餉平邊，下部議，不果。

論曰：武莊不早折，其功烈當偕開平上下。初與岐陽却，久之，岐陽赴其難如私仇，蓋猶夫中山之於開平也。而帝之密戒岐陽，不併及武莊，所以用武莊特妙。總一推誠，於周將呂珍，不失為武，於苗將蔣英等，遂致及身。精英貫白日。伍員死，抉目胥門；大海死，其兩如炬者不化。正直為明神，天亦肯之，而有苗不格，何也？行兵但能三事，不淫、殺與焚，顧何必讀書！而子德濟兩殺叛。

楊 璟

楊璟，合肥人。儒家子，少沉毅，讀書不喜章句，好武略。渡江來歸太平。既定江東，為親軍副都指揮使，助克婺州，進院判。漢平，為湖廣行省參政，移鎮江陵，招討湖南洞蠻功，進平章政事。洪武元年，充征南將軍，從湖湘取廣西，以左丞周德興、參政張彬副之。走漢周文貴，下寶慶，進擊永州。漢全州守將阿思蘭來援，逆擊，敗之，全、永俱下，遂圍靖江。時廖永忠已下廣州，使朱亮祖自府江來會。敵恃濠為固，璟殺其隄吏涸濠。困六旬，璟給降者白皮帽百，使人城為內應，遂克之，并下郴州，諭降左江土官黃英衍、田州土官岑伯顏等。而永忠亦從廣東迤而西，南寧一帶州郡皆下，廣西平。璟還京，為偏將軍，從大將軍征山西。璟出澤、潞，遇擴廓將韓札兒於韓店，戰失利。然以是分敵勢，大將軍遂克太原。檄定唐州，軍亂，鎮之。已奉命招撫夏明昇，昇不從。璟還，復與書曰：“足下據有蜀，即何如漢昭烈？昭烈曠世才，以諸葛佐之，然猶朝不謀夕，再世不祿。足下疆場，南北不過播漢，乃欲以一隅之地，為壽西陲，不必智者而決也。即以為險阻可恃，蠶叢魚鳧之鄉，不至足下矣。鄱陽一戰，友諒授首，旋師東討，張氏面縛，此非人力，實天命哉！江夏來歸，宥罪封侯，恩榮之盛，天下所知也。今之為足下謀者，率謂閉關以俟一日，至於事促勢窮，各自為富貴計。足下至孤，老母弱子，將安歸乎？詩曰：‘自求多福。’善敗之機，唯足下自審之。足下年幼未諳事勢，誰秉國成，獨不為身

首慮乎？”昇又不省。湖廣慈利土首覃垕鼓諸蠻為亂，率兵討之。初為所詐，執我部將黃永謙。上以書讓璟，刻日月定之。封營陽侯，食祿千五百石，世券。從湯將軍伐蜀，無功，不賞。沅辰蠻亂，為副將軍，從鄧愈討平之。十五年，卒，贈芮國公，謚武信。子通，與靖寧侯葉昇捕象廣西之左江。二十年，領韃靼官軍往戍雲南，多道亡，降普定衛指揮使。次達，散舍人。

論曰：開國武臣之諳文事者，自岐陽王而下，郭營國、胡縉雲，不三數人。芮國儒家子，進退以禮，故獲厥終。與明昇書，詞氣明爽。蒯通之不二假濟，非其說之短也。

薛 顯

薛顯，沛人。為元泗州守將。國初，馮宗異攻下揚州，顯以泗州降，授指揮。壬寅，助守南昌。漢友諒以大衆攻圍急，顯將銳卒突戰，斬其平章劉進昭，擒樞副趙祥，圍稍解。久之，斬鄧仲康於新淦，徇下江西諸郡，陞行省參政。伐吳，昇山之戰，五太子盛兵來援，常將軍戰稍却，顯舟師直前奮擊，大破之。遇春謝曰：“戰昇山，吾不如將軍。”論功，陞江西行省右丞。大將軍北伐，上諭顯可當一面。下元都，偵邏古北諸隘口，鹵元官喬右丞等三十四人。從征山西，破王保保，邀賀宗哲於石州，招諭保定諸山寨。會兵陝西，追擊，獲保保部將一人，知院三人，左右從官二人，馬二十匹。分攻馬寒山西番，大破之。張良臣以慶陽納降，命顯往受之。已而良臣有異志，夜半襲我營，顯被傷，突圍得免。良臣還為元守，王保保遣韓札兒

攻原州，為應援。顯與傅友德駐兵靈州遏之。是時，賀宗哲亦寇鳳翔，慶陽下，遁去。三年，封永城侯，不與券，諭顯曰：“顯屢摧大敵，奇男子。而性剛忍好殺。千戶吳富從朕久，有功，乃利其所獲，殺取之。又輕斃馬軍。今封爵如例，謫顯南海，以示懲。”明年，復召用，定祿千五百石，給世券。從征沙漠，取王保保。巡視河南。赴北平督兵屯田。二十年，從征降納哈出，還次山海關，卒。贈永國公，謚桓襄。無子，弟綱嗣。妻張，納券。胡黨事發，以死不論。弘治中，曾孫珍乞嗣，不許。

論曰：擅殺千戶富，乃不抵，謫南海而復之。帝惜其才氣，卒全之，得善終。其不生前入胡黨，倖也。雖然，帝於永城不甚却顧，故與所處宋、潁、涼三國異。三國才大，其不恭，且忘之，以須其有為，乃究竟不終。於永城獨否，恩威輒著，曰：此不足煩寤寐也哉。

郭興 弟英，入《乘時》目中；弟德成、孫登、五世孫勳，入《乘時》目中。

郭子興，嫌滁陽王，單名興，濠人。初，太祖微時野走，興父山甫一見嗟服，留款，辟人進曰：“僕非相人，相人多。足下天表特殊，他日富貴，毋相忘。”既去，語子若弟曰：“吾視若行輩，皆可秉珪，定以此人矣。”興拳勇，善騎射，隸滁陽王，與弟英旋從太祖宿衛。興自用兵滁、和，渡江，取金陵，陞管軍總管。克鎮江，進五翼總軍元帥。困常州三月，衣甲生蟻蝨。下宣州、江陰、婺州，破南昌。彭蠡大戰，興請用火攻，以是獲捷。從下武昌，洒血馳戰，陞鷹揚衛指揮使。援廬州，平吳，陞督府僉事。佐大將軍取